

Apeqquteqaat tunngavigalugu oqallittoqarnissaanik siunnersuut, qanoq iliornikkut aalisartunut piniartunullu atortuminnik piniutiminnillu pillugu. ajunaarnersuaqartillugu annaasaqarsimasunut pisortaniit ikiorsiisarnerup nukittorsarneqarsinnaanera.

(Inatsisartunut Ilaasortaq Anthon Frederiksen, Partii Naleraq)

Siullermeerneqarnera

Inatsisartunut ilaasortaq Anthon Frederiksen apeqquteqaat tunngavigalugu oqallissaarutaa tassalu aalisartut piniartullu atortuminnik pinngortitamik pissuteqartumik umiatsianik atortunillu annaasaqarnikkut ikiorsiisarnermut tunngasoq, tamannalu Partii Naleqqamiit oqaaseqarfissavarput.

Aalisartuuneq piniartuunerlu inuunerupput ilaqutariippassuarnik inuuniarnikkut inuussutissarsiornikkullu tunngaviusut sulilu ukiorpassuarni tamanna tunngaviusussaavoq, inuussutissarsiutimmi pingaarnersaraat aalisartuuneq piniartuunerlu.

Aalisartut piniartullu inuussutissarsiornerat oqitsuinnaanngitsoq ilisimavarput, pingaartumik inuussutissarsiummi atortorisatigut ajutoornikkut, assersuutigalugu motooriiarnikkut, umiatsiaajarnikkut ilami allaat qimmeerunnikkut aamma piniartut eqqornerlunneqarujussuuartarput.

Taakkuuppummi inuuniarnermikkut tunngavii, taamaattumik umiatsiaararsortunut piniartunullu inuuniarnikkut inuussutissarsiornikkullu aporfiusartut annertoqaat, ilaatigut inuussutissarsiornermik ilaqutanillu pilersuiniarnermi unittoornermik kinguneqartartut.

Isorliunerusuni najugallit eqqarsaatigalugit periarfissat killeqartaqaat, Tunumi piniarnerinnarmik Kujataani sumiffiit ilaanni, Avannaanilu sumiiffiit ilaanni piniarnerinnarmik inuussutissarsiuteqarput, tassanilu puisip amia kisiat annerusumik isumalluutigineqarpoq, tassalu

sillimasersuinissamut aamma aningaasanik sippulinnik akissaqanngitsut oqarluannaraanni uniorpallaarunangilaq.

Piniarnermut aalisarnermullu aquuteralaat atugaasorujussuupput taakkualu ilaatigut piusinnaanerat sivikitsuinnarsarpoq motorip nukkiorkluni ingerlajuartariaqarnera pissutigalugu, tamannalu motorimik akisoqisumik taarsiikulaarnermik pissuteqartarpoq, tassalu aningaasat pissarsiassat aamma tassuuna killilerneqareertarput annertuumik.

Ullumikkut ikiorsiisarnermi aningaasat tunngaviusut annikitsuinnaapput, tassalu 2.000 koruunimiit 25.000 koruuninut, pingaartumik motoriaarsimagaanni annikitsuinnaallutik, tamannalu qujanaraluartoq amigaartorujussuusartut oqaatigisariaqarpoq.

Umiatsiaararsortut ulluinnarni inuuniarnitsinnut neqissaqarniarnikkut pingaaruteqartorujussuarmik inissisimapput pinngitsoorneqarsinnaanngitsut inuppassuarnik inuussutissanik pilersuinermi.

Naalackersuisut akissutaat assorujussuaq pakatsinarpoq. Taamaallaat innersuussutigimmassuk piniartut aalisartullu sillimasiinermut akiliisarnissaanik kaammattuuteqarlutik, kisiannili tassa piviusut piniartunut aalisartunullu allaapput, pingaartumik umiatsiaararsortuinnaat eqqarsaatigalugit.

Aalisartut piniartullu umiatsiaarallit amerlaqaat imminnut napatinnerulernissaminut periarfissaqartinneqanngitsut Naalackersuinikkut.

Naaminneq inuussutissarsiorusukkualuartut aalisartut piniartullu allagartaajarlugit tunisinermut akuersissutaajarlugit qaleralinniarsinnaajunnaarlugit, saarullinniarsinnaajunnaarlugit ilami aamma nipsisanniarsinnaajunnaarsillugit mattussorpasi.

Taava qanoq ilillutik sillimasiinermut akissaqassagamik? Inuussutissarsiornermikkut mattussorneqarsimasut kikkut sillimasiinermut akissaqassagamik? Uanilu Naalackersuisut akissutaanni aamma oqaatigineqarpoq pisariaqartitsigunik pisortat ikiorsiissutaanik qinnuteqarsinnaasut.

Aap ajunngilaq tamanna, kisiannili tassa imminnut pilersorniartut mattussorpagut, isumaqarlutalu ajornartorsiulerunik pisortanukaannassasut kaammattorlugit.

Tamanna akuersaarneqarsinnaanngivippoq!

Ilungersoqaat aalisartut piniartullu pisortanik ikiorneqarusunnigkkaluarlutik, akissaqanngilagut inuit peqqissut imminnut inuussutissarsiorlutik ilaqutaminnik pilersorusukkaluartut isumagissallugit.

Partii Naleqqamiit kissaatiginngilluinnarparput inuit pisinnaasut inuiaqatiminnik nunaminnillu ikiorneqarlutik napatinneqassasut.

Imaattussaagaluarpormi tusaalaarsiuk!

Inuit peqqissut imminnut nunaminnillu napatitseqataassasut tamannalu angusinnaanngikkussiuk oqartussaaffik sapiinnerusunut tunniunniarsiuk, naalliutitsillutalu erloqisitsinerput naammaleqimmat.

Assersuut piviusoq Kangersuatsiami aalisartut piniartullu ukiut arlerpaat tunitsivik matoqqalluni, taava qanoq ilillutik tassani piniartut aalisartullu sillimmassiinnermut namminneq akissaqassagamik?

Qaleralinniarnermut saarullinniarnermullu akuersissummilluunnit tuniumaneqaratik ukiorooq siulleg qaleralinnut saarullinnullu aalisarsimangimmata tunitsiviammi matoqqavoq, tamanna paasineqarsinnaannginnami?

Napasumi tunitsivik Royal Greenland-imiit tunineqarmat aamma naalakkerneqarsimapput nunaqarfimmi aalisartut nipisaat suaanik pisiffigineqassanngitsut uffalu aamma nunaqarfik nipisanniarfissuusaraluartoq aalisartummi nunaqarfimmiullu inuussutissarsiutigaat susugununa akilaarsiuk!

Itillimi tunitsivik ullormut 2 tons saarulliit annerpaamik qanorluunniit peqartigigaluarpat tigoqquneqarput, sapaatip akunneranut piffissap ilaannaa ammasarluni, aalisartumut umiatsiamut agguaqatigiisillugu annerpaamik 150 kiilut, taava kikkut ilaqutaminnik pilersuinissaminnut aammalu sillimmasiinnermut akissaqassagamik?

Royal Greenland immaqa nunatta avataani atia ajunngikkaluarpoq, kisianni amerlasuunut maani nunalinnut taamak pilluarnartiginngilaq.

Tunumi tunitsiviit, Ittoqqoortoormiuni, Kummiuni, Sermiligaami Kulusumilu matoqqapput taava suna sillimmasiinnermut namminneq akissarissavaat? Kujataani aamma tunitsiviit ilaat mattoqqapput aalisartut piniartullu iluanaangeqaat tunisisinnaanertik killeqarluinnarmat paeriarfissaananiluunniit.

Nuussuarmi tunitsivik aallartilaaginnarluni ulikkaartarpoq taava allamik periarfissaqanngillat puisip amia eqqaassanngikkaanni kisianni tassa aamma qaammatit marluk missaani matoqqassapput ammit mamaarnerat pissutigalugu taava suna oori akissarissavaat sillimmasiinermut? Uffalu naammattorsuarnik eqqaanni aalisakkanik pisuussuterpassuaqaraluartoq, ajortumik ingerlavugut uagutsinnut killilersorusunnermik.

Taamaattumik sulii pisortat ikiorsiisinnaanerat umiatsiaajartunut motooriartunullu periarfissaajuartariaqarpoq, soorunami tamanna taamatuinnaq ingerlasinnaanngilaq uagutsinnut napatinniarutta, killilersorunnaarluta inuussutissarsiornikkut siuarsarniarta, ilagut aalisartut piniartullu mattussornagit, tunitsiviillu annertusarniartigit imaluunniit tassa namminersortunut tamaat tunisassiorneq periarfissiissutigineqarniarli.

Taakkuami malunnartumik akinut pitsaanerusunut ingerlatsinermullu pikkorinnerupput, pisortanik tunuliaquteqannginnamik, imminnut napatinnissaq anguniaramikku, tassa sinnattortitaanerput tamaanga killeqartariaqalerpoq aammami taamak sinnartutiginnilagut.

Pisortanik isumagineqarnerput minnerulissasoq sinnassaaitullu atussanngikkippu Naalakkersuisut akissutaanni takuarput. Partii Naleqqamiit ilumoorunneqarnerasoq tamanna takusinnaanngilarput, aalisarnerummi iluani mattuissuinerit taamak ingerlaannartillugit oqaatsinik ilumoorussisoqarnerasoq takusinnaannginatsigu.

Taamatut oqaaseqarluta Partii Naleqqamiit Anthon Frederiksen-ip oqallissaarutaa oqaaseqarfigaarput neriulluta ilaatigut oqaatsit sakkortugaluartut atukkagut eqqarsalersitsisimassasut ineriartorusuppugummi aalisartummi piniartullu anguniagaat aamma allaanerunngilaq nunartik inuillu napatikkusuppaat pitsaasumik periarfissinneqarunik.

Sinnassagaanerput tassa tamaanga killeqartariaqalerpoq.

Qujanaq.